

Holmo Henriquez di "Salba Urirama"...

Cueste loke cueste AVP kier sigui cu proyecto di molina

ORANJESTAD (AAN): Segun Holmo Henriquez di "Salba Urirama", cu atencion e tabata scucha e reunion tocante e presupuesto 2013 den parlamento. Mi persona a tuma nota locual cu Minister De Meza a contesta Lider di partido Movimiento Electoral di Pueblo, Evelyn Wever Croes, ora cu e Lider di partido a puntra tocante e status di proyecto di molina na Urirama. E Minister su contesta tabata cu, "E hinderwetvergunning ta den proceso y ora cu e worde

duna tur cos ta sigui cana su curso normal !!!"

Wel, pa casualidad ayera a cai den mi post bus, e petishon di Ministerie Van Justitie en Onderwijs, Minister Arthur Dowers, dirigi na e management team di Directie Volksgezondheid cu ta resorta bow di minister Richard Visser, data Maart 15, 2013, cu spoed, di cual onderwerp ta "Uw brief d.d. 29 November 2012, inzake het aanvraag om een vergunning ingevolge de hinderverordening ten behoeve

van Windparken Aruba Real Estate N.V.". Esaki ta apesar cu den e mesun carta aki ta poni cu tin hopi residentenan di Noord a manda firma di bezwaar, protesta, aden.

E pueblo di Noord y Aruba en general no lo acepta e arrogancia di e gobierno totalitario y dictador aki, y tampoko di Minister De Meza. Ora un gobierno ta insisti, cueste loke cueste, pa bay door cu e proyecto di Urirama, apesar cu e pueblo di Noord tin un cantidad di

firma en contra e proyecto aki, esaki ta oficialmente afirma cu e gobierno di AVP ta uno totalitario, e ta un gobierno dictador.

Esakinan ta exactamente e elementonan di ideologia neo-liberal cu kier pa pueblo di Noord y Aruba en general vota pa nan atrobe. Asina pa nan sigui masacra e pueblo aki na nan antoho. Dictadura nunca no tin e ser humano central. Pues e gobierno aki no tin e ser humano central y ta negligia e pueblo di Noord faltando nan

respet pa nan salud y bienestar en general.

E gobierno aki tin dos miembro den parlamento cu no kier sali na defensa di e pueblo di Noord. President di parlamento Paul croes en persona a firma hunto cu miles di ciudadano di Aruba contra e proyecto di Urirama. Awor el a cambia di idea y ta vota pro proyecto Urirama. Na unda e respet y democracia pa e pueblo di Noord y Aruba en general a keda?!?!?!?

AVP ta pasando den pueblo di Noord colectando firma pa insisti continuashon di e proyecto di molina na Urirama, paso nan lo tin debe politico pa paga back y pesey nan ta trapa riba e mihor interes di pueblo di Noord, cueste lo que cueste. E ta un berguenza y un sla duro den cara di Noord y Aruba. Con e pueblo di Noord Y Aruba en general por bay confia un ves mas den e dos Parlamentarionan aki, Paul Croes cu Juan David Yrausquin. Con e pueblo por bay confia den nan pa sali na nan defensa den situashon caminda cu mas Noord y Aruba tabata tin mester di nan. E parlamentarionan aki NO tin e pueblo di Noord na pecho y no ta muestra curashi pa para fuerte den nan sapato y sali na vanguardia di e salud y bienestar general di e constituyentenan di Noord.

Importante ta pa nos joven nan ta na altura di nos historia. Pesey ta hopi importante pa nos joven nan scucha di nos grandinan pa sa historia di nos pais. Tanten bo no sa di unda bo ta bin, bo no sa na unda bo ta bay. Importante ta pa tur hende corda cu ta AVP tabata e partido cu kier a bin cu un campo di prostitushon banda di nos Kapel di Altovista, na unda e pueblo di Aruba a para firme y protesta fuertemente. Al final ta e pueblo di Aruba a vence e partido di AVP. Awe nan kier impone un parke di molina rond di nos Kapel di Altovista. Pues tur hende por ripara cu cada ves nan ta laga tempo pasa pa hende lubida y despues nan bolbe ataca nos Kapel di Altovista.

Pueblo, prepara pa nos lanta si acaso e vergunning worde otorga y cu e partido AVP laga e pueblo na caya atrobe, paso e dos parlamentarionan den gobierno cu mester a sali na defensa di e pueblo di Noord, no tin weso di lomba ni e corahe pa frena e Premio Ministernan Mike Eman y tampoko Minister Mike De Meza.

Pueblo di Aruba, puntra boso mes ta den ken boso por confia y ta ken por sali na vanguardia di e digno pueblo di Noord y Aruba en general.